

古經天象考



古經天象考卷十二

通州雷學淇

演緒

秩祀

救禳

音律

術藝

秩祀

郊祀

寒暑四時霜雪雷電之祀

日月星辰風雨之祀

周易象傳曰雷出地奮豫先王以作樂崇德殷薦之上帝以配祖考

書帝典曰肆類于上帝 召誥曰用牲于郊

詩小雅曰來方禋祀以其騂黑與其黍稷以享以祀以介景福 大雅曰克禋克祀以弗無子 周頌序曰昊

天有成命郊祀天地也我將祀文王于明堂也時邁巡狩告祭柴望也思文后稷配天也噫嘻春夏祈穀于上

帝也

周禮大宰祀五帝則掌百官之誓戒與其具脩 掌次
王大旅上帝則張璫案設皇邸朝日祀五帝則張大次
小次設重帟重案 司裘掌爲大裘以共王祀天之服
充人掌繫祭祀之牲牷祀五帝則繫于牢芻之三月
大宗伯以禋祀祀昊天上帝 肆師凡師甸用牲於
社宗則爲位類造上帝封于大神祭兵于山川亦如之
典瑞四圭有邸以祀天旅上帝 司服掌王之吉服
昊天上帝則服大裘而冕祀五帝亦如之 大司樂
乃奏黃鍾歌大呂舞雲門以祀天神 凡樂圜鍾爲宮
黃鍾爲角大簇爲徵姑洗爲羽鼉鼓鼉鼗孤竹之管雲

和之琴瑟雲門之舞冬日至於地上之圜丘奏之若樂
六變則天神皆降可得而禮矣小司寇凡禋祀五帝
實鑊水

儀禮觀禮曰祭天燔柴

小戴記曲禮曰天子祭天地祭四方王制曰天子將
出類于上帝月令曰立春之日天子親帥三公九卿
諸侯大夫以迎春于東郊是月也天子乃以元日祈穀
于上帝仲春之月元鳥至至之日以太牢祠于高禩
天子親往立夏之日天子親帥三公九卿大夫以迎
夏于南郊仲夏之月大雩帝用盛樂
立秋之日天
子親帥三公九卿諸侯大夫以迎秋于西郊季秋之

月大饗帝 立冬之日天子親帥三公九卿大夫以迎
冬于北郊 禮器曰因天事天因地事地因名山升中
于天因吉土以饗帝于郊 郊特牲曰郊之祭也迎長
日之至也大報本而主日也兆于南郊就陽位也埽地
而祭於其質也器用陶匏以象天地之性也於郊故謂
之郊牲用騂尙赤也用犢貴誠也郊之用辛也周之始
郊日以至 祭之日王被袞以象天戴冕璪十有二旒
則天數也乘素車貴其質也旂十有二旒龍章而設日
月以象天也天垂象聖人則之郊所以明天道也帝牛
不吉以爲稷牛帝牛必在滌三月稷牛唯具所以別事
天神與人鬼也萬物本乎天人本乎祖此所以配上帝

也郊之祭也大報本反始也 祭法曰燔柴於泰壇祭

天也

春秋桓公五年秋大雩左傳曰秋大雩書不時也凡祀
啟蟄而郊龍見而雩始殺而嘗閉蟄而烝過則書 僖
公三十一年夏四月四卜郊不從乃免牲猶三望左傳
曰禮不卜常祀而卜其牲曰公羊傳曰魯郊非禮也

宣公三年公羊傳曰郊則曷爲必祭稷王者必以其祖
配王者則曷爲必以其祖配自內出者無匹不行自外
至者無主不止 成公十七年公羊傳曰郊用正月上
辛 襄公七年夏四月三卜郊不從乃免牲猶三望左
傳孟獻子曰吾乃今而後知有卜筮夫郊祀后稷以祈

農事也是故啟蟄而郊郊而後耕今既耕而卜郊宜其
不從也 哀公元年穀梁傳曰郊三卜禮也四卜非禮
也五卜強也郊自正月至於三月郊之時也我以十二
月下辛卜正月上辛如不從則以正月下辛卜二月上
辛如不從則以二月下辛卜三月上辛如不從則不郊
孝經曰昔者周公郊祀后稷以配天宗祀文王於明堂
以配上帝

淇按郊祀之見於周禮者六冬至祭昊天四時祭
五帝也是皆謂之禋祀見於月令者三春祈穀夏
大雩秋大享也是皆歲之常祀卽注謂一歲九祀
者也周無仲春郊禘之禮惟每月之吉告朔於明

堂其餘大災大故巡狩出征亦有郊禮非歲事之
常不在此數此二十一祀惟冬至爲祭天其餘皆
祭五帝五帝惟季秋爲正祭餘皆分祭告祭也孝
經曰昔者周公郊祀后稷以配天宗祀文王於明
堂以配上帝此卽專舉正祭而言古經凡曰天曰
昊天曰上天曰后天曰皇天曰五帝專稱也曰上
帝曰天神曰大神統稱也旅上帝止合祭五帝大
旅上帝則竝及昊天凡云旅與類造皆非常祀也
夫天一而已帝有六者立天之道曰陰與陽昊天
主之五行之氣分王五方五帝主之以人事言猶
天子與太岳四岳也以一身言猶心與元首四體

也王肅謂五帝卽月令之五人帝宋儒謂昊天與五帝止是一帝義皆未允夫陰陽五行化生萬物乃理氣之自然五行之化固本於陰陽然謂五行卽陰陽不可猶之方伯分掌五岳五體共於一身謂方伯卽天子五體卽心不可也今謂陰陽之氣有專主者五行之運無分王者獨可乎陳氏禮書曰五帝與昊天同稱帝不與昊天同稱天猶諸侯與天子同稱君不與天子同稱王也趙汭答或問曰五行之神爲五帝太皞之屬配焉今將迎氣於郊而廢其所配者主其配者太皞以降雖有功德亦人鬼也豈能司天時而布五氣乎古人駁王肅

等說如是然則鄭康成六帝之說乃經之明文無容訾議特感生帝靈威仰等名汨於緯候不足訓耳祈穀雩享及每月告朔皆合祭五帝四時之迎氣則分祭之惟皇天最尊歲止一祀雖旅類之禮非大災大故不敢昭告焉禮惟天子及王者之後有郊祀成王以周公有大勲勞不敢待以臣禮於是以魯爲文王後謂之宗國比於上公而賜以郊禘之禮其郊止祈穀自冬至及孟春卜用辛日不專在啟蟄祭亦止及蒼帝不祭后天雜記孟獻子曰正月日至可以有事於上帝穀梁傳曰郊三卜禮也卽此之謂此其所以異於周也三傳所言郊

禮惟穀梁氏合於魯制左氏公羊氏及雜記各得
一端郊特牲所言周魯素雜矣圜丘泰壇止是一
地名異實同合祀五帝皆在明堂此二者竝在南
郊惟四時迎氣各依其方所謂兆五帝於四郊也
祭天之禮降神在壇正祭在地所謂埽地而祭也
王之祈穀必在立春後之辛日既祭始藉於千畝
所謂啟蟄而郊郊而後耕也其常雩則必在孟夏
斯謂龍見而雩雩月雩之正也是月不雨則無及
矣月令從呂覽之說謂雩在五月孔疏誤解鄭注
謂啟蟄在二月此胥乖繆矣據尚書大傳五月命
民雩非君之雩也

以上郊祀

書帝典曰禋于六宗

周禮掌次云朝日祀五帝則張大次小次設重帟重案

鄭注朝日春分拜日於東門之外祭義曰周人祭日以朝及闇雖有強力誰能支之是以退俟與諸臣代有事

大宗伯以實柴祀日月星辰以粢燎祀司中司命

師雨師天府若祭天之司民司祿而獻民數穀數則

受而藏之

注云司民軒轅角也

典瑞王搢大圭執鎮圭纁藉五

采五就以朝日小司寇孟冬祀司民考工記云圭

璧五寸以祀日月星辰

儀禮覲禮云天子乘龍載大旂象日月升龍降龍出拜日於東門之外反祀方明禮日於南門之外禮月與四

瀆於西門外禮山川邱陵於北門外

鄭注云此謂會同於春夏秋冬也

大戴禮記保傳曰三代之禮天子春朝朝日秋莫夕月所以明有別也朝事曰天子冕而執鎮圭尺有二寸

纁藉尺有二寸搢大圭建太常十有二旒樊纓十有再就貳車十有二乘率諸侯而朝日東郊所以教尊尊也

小戴禮記月令曰孟冬之月天子乃祈來年於天宗

疏云

謂祭日月星辰也

玉藻曰天子立端而朝日於東門之外

祭法曰王宮祭日也夜明祭月也幽宗祭星也祭義

曰郊之祭大報天而主日配以月夏后氏祭其闇殷人祭其陽周人祭日以朝及闇祭日於壇祭月於坎以別幽明以制上下祭日於東祭月於西以別內外以端其

位

春秋莊公十八年穀梁傳曰天子朝日諸侯朝朔
襄公九年左傳曰陶唐氏之火正閼伯居商丘祀大火而
火紀時焉相土因之 昭公元年左傳曰日月星辰之
神則雪霜風雨之不時於是乎禋之

爾雅釋天曰祭星曰布祭風曰磔

逸書作雒曰乃設丘兆於南郊以祀上帝配以后稷
日月星辰先王皆與食

國語曰古者先王既有天下又崇立於上帝明神而
敬事之於是乎有朝日夕月以教民事君 周 天子

大采朝日少采夕月

魯

天子徧祀羣神品物諸侯

祀天地三辰及其土之山川

楚

詩序高子曰靈星之尸

史記封禪書秦始皇并天下雍有日月參辰南北斗
熒惑太白歲星填星辰星二十八宿風伯雨師廟社
亳有靈星祠

漢高祖八年或言周興而邑郃立后稷之祠至今血

食天下於是高祖令郡縣立靈星祠

漢書郊祀志
無郃字餘同

通典周制仲秋之月祭靈星於國之東南

又引李林甫所改月

令云秋分日享壽星於南
郊注云壽星南極老人星

淇按六宗之說古人聚訟伏生書傳謂是天地四
時馬融從之古尚書說謂天宗三日月星辰地宗

三泰山河海賈逵從之歐陽及大小夏侯謂是天
地四方中之氣揚雄李邵劉劭從之王莽孔光劉
歆謂是乾坤之六子日月風雷山澤王肅言於魏
明帝從之鄭康成謂祭上帝時日月已配食六宗
謂星辰司中司命風師雨師范甯孔穎達從之尙
書僞孔傳王肅僞家語及僞書孔叢子從禮記祭
法謂是四時寒暑日月星辰水旱朱子及蔡傳從
之虞喜謂是祭地之名劉昭王廉從之魏文帝謂
六宗卽上帝通典從之張髦謂是廟之三昭三穆
王安石從之張迪以爲六代之帝路史以爲天宗
地宗岱宗河宗幽宗雩宗黃澤以爲天之五帝及

地之大祇後無從者綜而論之皆未確也虞書曰
肆類于上帝禋于六宗望于山川徧于羣神此言
舜既受終告於天神地示及人鬼也類上帝是昊
天五帝望山川是五岳四瀆徧羣神是天神地示
二禮之小祀及凡古帝古臣之在祀典者以是推
論則諸言天帝者與上句覆諸言山澤者與下句
覆諸言帝臣者與末句覆且人鬼不得序於地示
之上僞書傳本於祭法似矣然祭四時雩水旱仍
是祀上帝雩祭亦非告祭之名來方禋祀卽兆於
四郊六代之帝卽昊天五帝之配月令之五人帝
不及高辛而祭
法謂有虞氏郊畧諸說惟鄭康成虞喜之言與經義近合